

տեր էր ընդարձակ կալվածքների, գլխավորապես Վերին Սիսիանում՝ Անգեղակոթի, Սիսիանի (Սիսավանի-Ղարաքիլիսայի), Շաքիի, ինչպես և Տաթևի մահալի վերնագավառում՝ Զաբուխի. մյուսը՝ Հաջի-Բեգլար-բեկը, մահալի քրդական վայրերում՝ Զիջիմլիի, երրորդը՝ կապիտան Ռուստամ-բեկը՝ այնպիսի խոշոր գյուղերում, ինչպիսին էին Կոռնըձորը և Խանածախը (Քեշիշքենդը), որոնք Տաթևի մահալի սահմաններումն էին, որտեղ Տեղն էլ պատկանում էր Ռուստամ-բեկի որդի Ասատ-բեկին, իսկ Ռուստամ-բեկի մոր կալվածքն էր Յերիշեն՝ (Գեդիշա) հայկական գյուղը։ Այս ընտանիքը բավականին մեծ դեր էր խաղում ամբողջ Եռաբլրի (Ուշթափալարի) սարահարթի և հարևան Ղարաբաղի հրաբխային բարձրավանդակի վրա, որտեղ գրեթե, բացառապես նրանց էին անմիջապես ենթարկվում բազմաթիվ թրքական* և քրդական ձմեռանոցներ։ Այս ընտանիքից մանավանդ Հաջի-Աղալար-բեկը, որը ուներ նաև ռուսական կապիտանի տիտղոս, ստացել էր մեծ հեղինակություն Մեհտի-Ղուլի խանին մատուցած ծառայության համար։ Նա «ստացել էր որպես սեփականություն նաև ամբողջ Սիսիանի մահալը»³։ Նրա կալվածքները ընդարձակվել էին մեծ հուշակ վալիոդ ռուսական զենքերալ Կոտլարևսկու միջնորդությամբ։ Նրան զիջված էին ժառանգաբար մի քանի պետական տուրքերն, օրինակ՝ Բալան-թաղը՝ Տաթևի, Կյուպարայի և Աճանան թուրք մահալներից, երկու ձիավոր պահանջելու իրավունքը Գորիսից, 6 արոր մեկ ամսով հնձորեսկից Կուբաթլիի հողերը վարելու համար։ Այսպիսի ազդեցիկ կալվածատիրոջ ներկայությունը մահալում չափազանց թուլացնում էր մահալի մեկիքի իրավասությունը։ Նույնպիսի խառնաշփոթություն էր մտցնում նաև մասնավոր մեկիքների առկայությունը մահալի առանձին գյուղերում, օրինակ՝ Գորիսում, որտեղ կառավարում էր մեկիք Հարությունը։ Այսպիսի դրություն տեղի ուներ ոչ միայն Սիսիանի և Տաթևի, այլև մնացած մահալներում։ Մահալը չէր ներկայացնում վարչական ամբողջություն և մահալական մեկիքի իրավասությունը հավասարապես չէր տարածվում մահալի բոլոր մասերում, ինչպես նաև մահալում ապրող բոլոր ազգությունների վրա։ Մինչդեռ հայ բնակչությունը կառավարվում էր և դատվում դարերի ընթացքում տեղական պատմական պայմաններում մշակված իրավահասկացողությամբ, թուրք և քուրդ բնակչությունը դեռ ուժեղ պահպանում էր իր գրսից բերած ցեղական կազմակերպչական ձևերը և ըստ մահմեդական իրավունքի՝ դատական գործերում ղեկավարվում էր շափաթով։

Ըստ Մոգիլևսկու և Երմոլով 2-րդի նկարագրության հնարավոր է գծել այն ժամանակվա մահալների քուրտեզը⁴։

Սիսիանի մահալ. մեկիքը նստում էր Բոնակոթ գյուղում. 1823 թվականին մեկիք Թանգին էր։ Մահալը ընդգրկում էր նաև Ախլաթանը, Ղըզըլշաֆակը՝ Շխլարը, Արավուսը (Սաֆար Ալի կամ Շահարջի 2-րդը), Ուզը, Ուռուտը, Դաստակերտը, այսինքն՝ դեպի Որոտան (Բազարչայ) բացվող աջակողմյան գետահովիտները. այստեղ 9 գյուղերում ղեկավարված էին 203 ծուխ՝ ընտանիք, որոնցից 103-ը հայ և 100-ը թուրք։

³ «В вознаграждение усердия его Мехти-Кули-хан весь сей (Сисианский) магал с принадлежащими к оному землями потомственно подарил в собственность Аджы-Агалар-беку».

⁴ Տե՛ս կցված քարտեզը։ Հեղինակը չի հասցրել գծելու (Ման. խմբ.)։

* Հեղինակը «թուրք» բառի տակ նկատի ունի այժմյան ադրբեջանցիներին։ Խմբ.։